

印鸞章
夏田藍 修訂

袁了凡
王鳳洲
網鑑合編

世界書局印行

袁王綱鑑合編增訂序

袁王綱鑑爲吾國史書之一。史者所以紀述人類社會廣續活動之體相。校其總成績而資其鑑戒。爲吾人不可不讀之書。此學者所公認也。然欲取而徧讀之。則我國浩如煙海之史書。如二十四史。九通。五紀事本末。以及其他雜史別史。不下數萬卷。童而習焉。白首未能盡。在昔學者。猶苦其難。況今日百科並進。安有餘力。以究全史。此又學者所共知也。往者雖在上海東吳明強各中學。忝任講席。垂十數年。於歷史一科。每多困難。蓋各校所沿用之歷史教本。或講義。非廓落大言。卽零星短帙。舉一漏萬。開卷茫然。學者苦之。教者亦竭蹶而無補於事。心竊痛之。久欲編一善本。以爲學者課餘之助。而人事牽率。卒卒未有所聞。壬戌秋。世界書局主人。以袁王綱鑑合編。屬鸞修訂。因念編撰之事。革不如因。袁王綱鑑。合陳水考亭兩家之書。而冠以金仁山之前編。劉道源之外紀。另以元明各鑑史續之。編年紀事。有綱有目。有鑑。且搜集漢唐以來。百數十名家之論撰。作爲批註。上下數千年。家國興亡。政治得失。文化演進。制度沿革。均瞭如指掌。誠研究史學者。不可不備之書也。願是書成於明清之間。承專制之積弊。其內容與今日民主時代國民之需求。似略有刺謬。爰集各家刊本。比合異同。芟其膚詞。存其要義。簡其撰述。詳其考證。舉一切無關史學之正軌者。

本中正不阿之態度。廓而清之。而一以人類生活之演進爲歸。使讀者開卷卽能了然於吾國數千年來。民族進化之軌跡。與夫團體生活之狀態。因流而溯源。據往以推來。亦古今得失之林也。昔人有言曰。知古而不知今。謂之陸沈。知今而不知古。謂之盲瞽。莘莘學子。得此編而觀摩探索之。或亦免盲瞽之誚也乎。

民國十二年癸丑十月十六日鹽城印鸞章

原序一

居恒每謂域中有三大。天大道大史大。史蓋乘天之運。秉道之公。維持名教於無窮。王侯卿士。聖賢愚不肖之德業功罪。與萬世共觀之法戒。凜如袞鉞乎。周官太史掌建邦之六典。以逆邦國之治。凡辨法者攷焉。萬民之有約劑者藏焉。內史掌王之八枋之法。以詔王治。凡四方之書。內史讀之。掌書王命。遂貳之。外史掌書外令。掌四方之志。三皇五帝之書。御史掌邦國都鄙及萬民之治令。以贊冢宰。凡治者受法令焉。左史記言。右史記事。王不得與目。典制抑何其隆重哉。周中葉失官。列國亦各有史。不統於一。孔子乃因魯史修春秋。於平王己未四十九年。魯人立惠公之子息姑。是爲隱公元年。始載筆寓褒貶。以正一王之法。訖敬王庚申三十九年。春西狩獲麟時。因道不行。又修詩書。詩多存周。綴頌商魯。書則斷自堯典。訖秦誓。書卽左史之言。春秋卽右史之事。而今皆尊之爲經。蓋聖人法天尊道。以垂教。豈學徒能贊一辭哉。惟司馬遷式尙書起堯典。作五帝本紀。實黃帝高陽帝嚳堯舜。而三皇覺夢存亡之世。則不書。訖天漢而止。左邱明依春秋爲傳。典則溫麗。今並稱左馬。膾炙儒林矣。自是班固前漢書。詳整有法度。可與龍門差次稱盛。范曄後漢書。詞語溫潤。雖大樸微斂。尙燦如可觀。以後三國志。晉書。唐書。五代史。十九史。汗牛充棟。僅紀錄當時之名迹。

耳。然皆分部揚鑲。各依朝代。求折衷於孔子之尚書春秋。自黃帝八年訖今。七十三甲子。集成爲帙。俾四千餘年人事。若指諸掌。則戛戛乎難哉。惟宋元豐七年。端明殿學士司馬光。上資治通鑑。參攷羣書。評其同異。上起周威烈戊寅二十三年。初命晉大夫魏斯趙籍韓虔爲諸侯。下訖五代。蓋光與劉邠劉恕范祖禹及子康所編集。光自出知永興軍。差判西京留司御史臺。及提舉崇福宮。前後大任。聽以書局自隨。歷十九年而成。合三百五十四卷。然避續春秋之嫌。不敢緊接獲麟。敬王庚申後。尙立五年。元王立七年。貞定王立三十有八年。敬王立十有六年。乙卯崩。威烈王丙辰立。至戊寅卅三晉垂七十年矣。朱考亭熹就資治通鑑爲綱目。綱師春秋。目仿左傳。褒貶極其嚴正。而楊慎丹鉛總錄云。綱目乃朱子門人趙師淵奉師命所編。非朱子手筆。故文辭遜於資治云。然馬班已降。世會自不能爲先秦兩漢。但論義例主意。文辭焉可求備哉。至威烈以前。雙翅秦古。五代以後。更歷宋元。皆出於通鑑綱目之外。非有徵信。何以流傳。幸京兆劉恕有通鑑外紀。起三皇本紀。止周共和。蘭谿金履祥有通鑑前編。起陶唐。止威烈。宋則丹稜李燾有續資治通鑑。元則四明陳桱有通鑑續編。至我明商素庵輅有續編宋元綱目。而萬曆間樵李袁君黃。世稱了凡先生者。高第甲科。爲郎司馬門。枕藉史。黼黻河漢。和合諸公之所纂紀。聯集涑水考亭之前後。名曰歷史綱鑑補。刪煩就簡。事備而文約。曰紀曰編曰

綱曰目。欵識攸明。乃二百四十年之春秋。曰經曰傳。冠履無倒。更以己聲爲斷。立論多奇。不盡落宋儒蹊徑。比於蘇紫溪。濬李九我。廷機之刊行於世者。似覺有進焉者矣。嗚呼。作史貴擅三長。讀史尤須獨見。鴻荒以來。循蜚因提。禪通疏。乞諸名氏。或繇子書寓言。而談天紀歷。強半謠譌荒唐。事受曖昧之誣。功成罪過之案。南董以後。多曲筆。公穀以外。有深文。冠園冠襟大裾。以喉脅持橐。尙論千古者。必格物窮理。參以識力。而後齊諧稗官有所衷。嘖室徂邱不待闕而自服矣。修道立教。法天之雨露雷霆。以勸懲萬世。此願學孔子者之責也。

賜進士第正治上卿資德大夫太子少保禮戶兵刑四部尙書都察院左都御史南昌熊明遇撰

原序二

史者。一代之成書。實萬禩之公論。公論者。善其善。惡其惡。是是非非。一定之衡也。一代書成。而公論不盡歸之龍門。茂林曠世鉅筆。說者譏其記繁而志寡。要其書之堅潔整瞻。有非蔚宗所逮者。下此惟廬陵五代史。凌燦古今。子瞻猶短其作傳有漏。況十九史紛紛籍籍。文成而義不屬者夥邪。稽古史卽經也。尙書之文是也。自堯典至秦誓。世數缺有間矣。孔子刪之。曰式訓來世。文不必備云爾。周衰。孔子從平王四十九年。值隱公元年。作春秋。本魯史也。魯前此無史乎。筆削訖二百四十二年。蓋聖人若是其愼也。況春秋未作。暨絕筆之後。列國非無記注。自日尋干戈。若存若亡。迄於秦火。遂茫不可跡。而春秋焰而猶存。此誠大聖人公論不可滅。故史也而尊曰經。與尙書並傳云。自秦以來。大義蔑如。迄宋陳水司馬光輯資治通鑑。歷十九年而成書。起周威烈王戊寅二十三年訖五代。其中自周敬王庚申至威烈王戊寅七十餘年不續。蓋獲麟以後。不復有作者。陳水以意承之而義不敢當。故闕如也。考亭朱子熹因通鑑爲綱目。黜魏帝漢義例嚴正。真是非不謬於聖人。善乎劉永新之言曰。尙書言紀傳。春秋著編年。溫公取尙書之紀傳史約之以爲編年通鑑。而文公倣春秋大書以爲之綱。三傳分註以爲之目。通鑑綱目。是爲尙書春秋之子孫者。審此則公論

久定。讀史家舍通鑑綱目。其孰從而求之。惟時爲涑水所辟。有京兆劉恕著通鑑外紀。起三皇。訖周共和。厥後有蘭谿金履祥著通鑑前編。起陶唐。止咸熙。京兆爲蘭谿所譏刺。以自堯而上。輕信百家。併可傳者。悉削不錄。此則太古載記。無繇聞知。於史之體。蓋闕焉。後此如宋丹稜李燾有續資治通鑑。元明州陳桎有通鑑續編。我明淳安商輅有續編宋元綱目。是皆有以足涑水考亭所不逮。余生也晚。竊有志於史學。於是綜集歷史。創繁就簡。辨誣存真。而一以涑水通鑑考亭綱目爲歸。前乎咸熙探之京兆。蘭谿補其缺。後乎五代因之丹稜。明州淳安續其終。大要以綱爲主。而鑑與目爲附。紀與編其前列者也。搜討參訂。羣書悉攷。勒成一編。名曰綱鑑會纂。其備也。嗚呼。通鑑綱目不作。則尙書春秋之旨漸微。習春秋者。進而通乎尙書。習尙書春秋者。推而及於綱鑑。讀綱鑑者。翹而歸於尙書春秋。自古迄今。帝王卿相。聖賢愚不肖。袞鉞較著。公論不移。其爲義也。迺足以立治。非治治也。治亂也。請以是編爲涑水考亭之附庸也可。至史斷之辭。濫不收。美不遺。期於詳而止。管窺閭附。當更俟諸公論焉。

瑯琊鳳洲王世貞撰

凡例

一袁王綱鑑初爲構李袁黃所著。名曰歷史綱鑑補。其後瑯琊王世貞更參訂羣書。彙爲一編。名曰綱鑑會纂。至清人復合兩家之書。刊行於世。名曰袁王綱鑑合編。

一本編體例。仍照原書。分綱目鑑三種。以年爲經。以事爲緯。自周威烈王以前及宋元以後。陳水通鑑。考亭綱目。俱未之載。則酌用金履祥之通鑑前編。劉道源之通鑑外紀。以開其端。陳子桎之通鑑續編。商素庵之宋元綱目。以紹其緒。末復殿以明鑑綱目十六卷。增編清鑑綱目十六卷。以補袁王舊本之未備。成首尾一貫之完書。

一周自平王東遷而後。至於威烈。事莫備於春秋。本編雖不能悉載。而關於會盟征伐之大。已見春秋者。則仍用春秋原文。以嚴筆削。

一紀事必提其綱。其中亦有無綱而僅列鑑與目者。非漏略也。以大義已具於目與鑑之中。一覽昭然。不必先贅其目與鑑。有爲鑑之所無者。則標目字。有爲目與鑑同者。則標鑑字。因通鑑在綱目之先。考亭特沿用陳水成文。故賅之以鑑也。

一依綱鑑定例。凡關於國之興亡。世之治亂。帝王將相之賢否。土地人民之分份。與夫政治制度之沿革。文化經濟之變遷。凡足以資觀摩而昭

鑑戒者。則備書之。其餘無補世教民彝者。悉置弗錄。示不以細行瑣故而溷正史也。

一編次千支。標於年事之上。爲綱目定例。但高辛以前。無甲子可紀。則紀自唐堯甲辰始。至唐虞稱載。夏稱歲。商稱祀。周以後稱年。則皆隨時代而書。不相因襲。

一綱目於歷代紀年之際。凡正統則用大書。非正統則用分註。其界最嚴。本編亦仍其例。惟有未改歲而事涉兩朝。如元明之間。則用一年兩系之例。以存其統。其有土地分裂。而各爲系統。如南北朝者。則於綱上各冠朝名。以示區別。

一綱目於命官時。惟宰臣皆書。餘官非有故不書。今沿其例。凡宰臣之拜免及卒皆書。餘官黜陟。及名賢生卒。有關政教者。亦以特書例書之。

一凡一事而首尾相距頗遠者。若前後皆爲立綱。雖起訖自明。而尋檢非易。今皆循其事之本末。酌行總敘。或於初見一條。備言其終。或於最後一條。追敘其始。以資貫通。

一史斷自兩漢而下。以及先儒論撰。有裨史學者。不憚詳搜博采。以冀折衷一是。惟其中腐者去之。粹者存之。或錄全篇。或採一節。各載姓名於上。俾便觀摩而資研習。

一歷代輿地。不可不知。郡縣分合。古今沿革。悉按現在疆域。詳爲註明。至

文中有字句難明者。則酌加音釋訓詁。務使明白了解。藉便初學。
一本編竭個人心力。增修刪訂。雖詳加蒐討。而時間匆促。疏漏舛誤。在所
不免。當世宏達。幸賜匡正。

讀綱鑑要法

論綱
目所
由作

論綱
目大
旨

論綱
目正
例變

朱子曰。司馬文正公。編資治通鑑及目錄。胡文定公。脩舉要補遺。因兩公四書。別爲義例。增損鑿枘。以就此編。蓋表歲以首年。而因年以著統。大書以提要。而分注以備言。歲周於上。而天道明矣。統正於下。而人道定矣。大綱槩舉。而監戒昭矣。衆目畢張。而幾微著矣。又曰。此書無他法。但其綱欲整嚴。而無脫落。目欲詳備。而不繁冗耳。

李方子曰。朱子綱目。簡而周。詳而整。綱倣春秋。而參取羣史之長。目倣左氏。而稽合諸儒之粹。至於大經大法。則一本於聖人之述作。使明君賢輔。有以昭其功。亂臣賊子。無所逃其罪。而凡古今難制之變。難斷之疑。皆得參驗稽決。以合於天理之正。人心之安。則是繼春秋而作。未有若此書之盛者也。

尹起莘曰。先生書法。有正例。有變例。則始終興廢。災祥沿革。及號令征伐。殺生除拜之類。義固可見。若其變則善爲可法。惡爲可戒者。皆特筆書之。如張良在秦。而書曰韓人。陶潛去宋。而書曰晉士。揚雄在漢。而書曰莽大夫。在一統之時。而以分注其年。武氏改號光宅。而止書中宗嗣聖之類。是皆變文見意者也。其間微辭奧義。有不可得而徧舉者焉。

程子曰。凡讀史。不徒要紀事跡。須要識其治亂安危。興廢存亡之理。且如讀高帝紀。便要識得漢家四百年終始。治亂如何。是一學也。朱子曰。程先生每讀史到一半。便掩卷思量。料其成敗。然後却看有不合處。又更精思其間。多有幸而成。不幸而敗。今人則見成者便以爲是。敗者便以爲非。不知成者煞有不是。敗者煞有是底。又曰。讀史須見聖賢所存治亂之機。賢人君子出處進退。便是格物。又曰。明道先生看史。逐行看過。不差一字。

呂東萊曰。大抵看史。見治則以爲治。見亂則以爲亂。見一事則止知一事。何取觀史。如身在其中。見事之利害。時之禍亂。必掩卷自思。使我遇此事。當作如何處置。如此觀史。學問亦可以高。智識亦可以高。方爲有益。

蘇東坡曰。秦以暴虐焚詩書而亡。漢鑒其弊。必尙寬德。崇經術之士。故儒者多。雖未知聖人。然學宗經師。有識義理者衆。故王莽之亂。多守節之士。世祖繼起。不得不崇經術。褒尙名節之士。故東漢之士。多名節。知名節而不能節之以禮。遂至於苦節。苦節之士。有視死如歸者。苦節既極。故魏晉之士。變而爲曠蕩。尙虛浮。而亡禮法。禮法既亡。故其亂已甚。必有英雄出而平之。故隋唐混天下。隋不可謂一天下。第能驅除爾。唐有天下如貞觀開元間。雖號治平。然三綱不正。無父

子君臣夫婦其原始於太宗也。故其後世子孫皆不可使。玄宗才使肅宗便叛。肅宗才使永王璘便反。君不君。臣不臣。故藩鎮不實。權臣跋扈。陵夷有五代之亂。漢之始過於唐。漢大綱正。因問十世可知。遂推此數論。

邱瓊山曰。周之衰也。分而爲春秋戰國。終而收拾之以秦。於是乎漢興焉。漢之衰也。分而爲三國南北朝。終而收拾之以隋。於是乎唐興焉。唐衰而五季紛亂。世宗於其間。以治易亂。氣勢將合矣。有宋繼而闡以文。宋衰而女真分裂。蒙古乘其後。明撥亂而反之正。噫。自唐虞之後。帝王之興。代必三者。三才之道也。天地人之異統。忠質文之迭尚。始之以夏商周。繼之以漢唐宋。終而復始。明之興。其視商周之夏唐宋之漢乎。

李空同曰。古史莫如書春秋。孔子刪修。寡篇而字嚴。左氏繼之。辭義精詳。遷固博采。簡帙省縮。以上五史。讀者刻日可了。其冊可挾而行。可箱而徙。後之作者。本乏三長。劉知幾謂史有三長。曰才。曰學。曰識。竊名效芳。輒附筆削。

義非指南。辭殊禁臠。傳敘繁蕪。事無斷落。范曄後亦知史不貴繁。然剗精削采。着力字句之間。故其言枯體晦。文之創者也。蓋不知古史文約而意完。非故省之言之妙耳。下逮三國南北諸史。遠不及曄。漫復難觀。書本出羣手。體製混雜。俗雅錯紛。歐陽人雖名世。唐書新靡。

加故。今之識購故而廢新。五代史承一家言。是矣。然古史如畫筆。形神具出。覽者踴躍。歐無是也。至於宋元二史。第據文移。一概鈔謄。辭義兩蔑。其書各逾百帙。觀者無所啓發。展卷思睡矣。僕謂諸史猶可耳。晉宋元三史。必修之書也。若宿學碩儒。後漢而下。種種筆削。誠萬世不刊之典。或憚其難。止取二史。約而精之。亦弘文之嘉運也。

袁王綱鑑合編先儒名公姓氏錄

西漢

龍門司馬氏

按本傳司馬遷字子長龍門人父談爲太史遷繼父業作史記

洛陽賈氏

按本傳賈誼洛陽人有才名嘗著過秦論

彭城劉氏

按本傳劉向字子政本名更生著洪範五行列女傳新序說苑

東漢

茂林班氏

按本傳班彪字叔皮茂林人著王命論及賦論等事凡九篇○班固字孟堅著西漢書及兩都賦

扶風曹氏

按本傳班昭字惠姬終之女適曹世叔早寡即習六經之說其著漢書後漢書之

平陵賈氏

按本傳賈逵字景伯平陵人所注史記及若經傳義並論難百餘萬言

茂陵馬氏

按本傳馬融字季長茂陵人校正史記詁誤

南陽劉氏

按本傳劉珍字秋孫南陽蔡陽人作建武以來名臣傳

瑯琊伏氏

按本傳伏犧字景弘瑯琊人所著有前漢書糾謬

北海鄭氏

按本傳鄭玄字康成北海高密人官注史記

滎陽服氏

按本傳服虔字子慎河南滎陽人註前漢書

潁川荀氏

按本傳荀悅字仲豫潁川潁陰人烈之孫刪漢書爲帝紀三十卷

汝南應氏

按本傳應劭字仲遠汝南人著漢官儀及風俗通行於世

南陽文氏

按本傳文穎字叔良南陽人前漢書一百三十二卷

三國

巴蜀譙氏

按蜀志譙周字允南巴西人官著古史考

陳留蘇氏

按魏志蘇林字孝友陳留人官註前漢書一百三十卷

東海王氏

按魏志王肅字子雍東海人所著有史記及諸經傳註

安平孟氏

按魏志孟康字公休安平人著前漢書行於世

馮翊如氏

按魏志如淳馮翊人著前漢書行於世

雲陽韋氏

按吳志韋昭字洪嗣雲陽人嘗撰吳書

餘姚虞氏

按吳志虞翻字仲翔餘姚人所著有史記國語訓註傳於世

中山張氏

按魏志張晏字子仲中山人所著有西漢書音釋四十卷

西晉

高唐華氏

按本傳華嶠字叔駿高唐人表之子自作漢紀三十卷

巴蜀陳氏

按本傳陳壽字承祚巴西人撰三國志六十五篇

河南晉氏

按本傳晉灼字子威河南人所著有前漢書音釋四十卷

高平劉氏

按本傳劉寔字道真高平人所著有歷代史書考異行世

泥陽傅氏

按本傳傅玄字奕本靈州人徙居泥陽撰藏書

東晉

河東郭氏

按本傳郭璞字景純河東人博學高才注爾雅及西漢司馬相如傳

陽夏袁氏

按本傳袁宏字彦伯陽夏人所著有三國傳及東征等賦